

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
BROJ: 65 0 Ps 891909 21 Ps
Sarajevo, 04.07.2024. godine

OPĆINSKI SUD U SARAJEVU, stečajni sudija Mirsada Karahmetović, odlučujući o Prijedlogu da se otvori stečajni postupak (u daljem tekstu: prijedlog) koji je podnesen od strane podnosioca prijedloga Orhan Halebić ulica Zelenih Beretki 12, Konjic, koga zastupa punomoćnik Vedran Eterović, advokat iz AD Eterović nad licem CAPITAL MARKET SOLUTIONS d.o.o. Sarajevo, ul. Milana Preloga broj 12, Sarajevo, JIB: 420231700002, MBS – matični broj subjekta: 65-01-0001-17, dana 04.07.2024. godine, donosi sljedeće

R J E Š E N J E

Otvara se stečajni postupak nad imovinom stečajnog dužnika „CAPITAL MARKET SOLUTIONS“ d.o.o. Sarajevo, ul. Milana Preloga broj 12, Sarajevo, JIB: 420231700002, MBS – matični broj subjekta: 65-01-0001-17.

Za stečajnog upravnika uvjetno se imenuje lice Edis Mustafić ulica Azize Šaćirbegović bb, Sarajevo, pod uvjetom da nema smetnji za njegovo imenovanje na poziciju stečajnog upravnika u smislu člana 71. stav 2. točka c. i člana 76. Zakona o stečaju. Nalaže se stečajnom upravniku da odmah, odnosno najkasnije u roku od 3 (tri) dana od dana prijema ove odluke suda dostavi stečajnom sudu pozivom na broj spisa pismenu izjavu.

Vrijeme otvaranja stečajnog postupka utvrđuje se dana 04.07.2024. godine u 14,00 sati.

Određuje se upis zabilježbe o otvaranju stečajnog postupka u sudskom registru Općinskog suda u Sarajevu u matičnom registarskom broju subjekta upisa broj: 65-01-0001-17.

Nalaže se stečajnom dužniku i trećim licima da stečajnom upravniku predaju u posjed imovinu i dokumentaciju stečajnog dužnika koja je u njihovom posjedu.

Pozivaju se povjerioci da u roku od 30 (trideset) dana od dana objave rješenja u „Službenim novinama Federacije BiH“ prijave kod stečajnog suda svoja potraživanja u skladu sa članom 174. Zakona o stečaju, obavijeste stečajnog upravnika o tome koja prava osiguranja potražuju na predmetima imovine stečajnog dužnika i na kojim predmetima se potražuje pravo osiguranja, vrsta i razlog nastanka prava osiguranja, kao i osigurano potraživanje.

Povjerilac pisanim putem prijavljuje svoja potraživanja stečajnom sudu i u prijavi navodi podatke: firmu i sjedište, odnosno ime i prezime, prebivalište ili boravište povjerioca sa adresom, pravni osnov i iznos potraživanja, broj transakcijskog

poslovnog računa ili nekog drugog računa povjerioca, jedinstveni identifikacioni broj, matični broj pravnog lica, jedinstveni matični broj fizičkog lica. Povjerioci koji imaju potraživanja izražena u stranoj valuti, dužni su da ih konvertuju i prijave u domaćoj valuti. Ako se prijavljuju potraživanja u kojima je u toku sudski ili drugi postupak, u prijavi se navodi organ pred kojim se vodi taj postupak uz navođenje broja predmeta. Razlučni povjerioci označavaju u prijavi dio imovine stečajnog dužnika na koji se odnosi njihov zahtjev i iznos do kojeg njihova potraživanja po predviđanju neće biti namirena razlučnim pravom. Izlučni povjerioci označavaju u prijavi predmet u imovini na koji se njihov zahtjev odnosi. Stečajni povjerioci podnose prijavu potraživanja u dva primjerka, sa dokazima o osnovanosti potraživanja.

Uz prijavu, povjerioci su dužni priložiti sudu i potvrdu o uplaćenom pripadajućem iznosu sudske takse, i to kako slijedi: za prijave povjerilaca iznos od 1% od vrijednosti potraživanja, s tim da taj iznos ne može biti manji od 20,00 KM niti veći od 10.000,00 KM.

Pozivaju se lica koja imaju obaveze prema stečajnom dužniku, da ih bez odgađanja izvršavaju prema stečajnom dužniku.

Otvaranjem stečajnog postupka prava stečajnog dužnika da upravlja i raspolaže imovinom koja pripada stečajnoj masi, kao i prava organa stečajnog dužnika, prokuriste, zastupnika i punomoćnika stečajnog dužnika prelaze na stečajnog upravnika.

Otvaranjem stečajnog postupka prava i obaveze privremenog stečajnog upravnika prelaze na stečajnog upravnika.

Stečajni upravnik dužan je da sačini popis svih povjerilaca stečajnog dužnika za koje je saznao i do kojih je došao iz knjiga i poslovne dokumentacije stečajnog dužnika i sačini nacrt tabele prijavljenih potraživanja.

Stečajni upravnik ima sva prava i obaveze propisane Zakonom o stečaju, kao i temeljem pozitivnih propisa.

Otvaranjem stečajnog postupka prekidaju se sudski i upravni postupci, kao i postupci pred arbitražama, ukoliko se odnose na stečajnu masu.

Punomoć stečajnog dužnika koja se odnosi na imovinu koja ulazi u stečajnu masu prestaje da važi otvaranjem stečajnog postupka.

Danom otvaranja stečajnog postupka gasu se računi stečajnog dužnika i prestaju prava lica koja su bila ovlaštena da raspolažu imovinom stečajnog dužnika na računima. Stečajni upravnik će otvoriti nove račune stečajnog dužnika i odrediti lica koja će biti ovlaštena da raspolažu sredstvima na tim računima.

Nakon otvaranja stečajnog postupka, registarski sud po službenoj dužnosti u registru poslovnih subjekata uz firmu ili naziv stečajnog dužnika upisuje ili dodaje oznaku „u

stečaju“, a u rubrici „Lica ovlaštena za zastupanje subjekta upisa“, umjesto direktora upisuje stečajnog upravnika.

Stečajni upravnik dužan je da sačini popis predmeta stečajne mase. Za svaki predmet potrebno je navesti njegovu vrijednost. Ako vrijednost zavisi od toga hoće li stečajni dužnik nastaviti poslovanje ili ne, potrebno je navesti i tu vrijednost.

Stečajni upravnik dužan je da sačini popis svih dužnikovih povjerilaca za koje je saznao iz knjiga i poslovne dokumentacije stečajnog dužnika, prijave njihovih potraživanja ili na drugi način. U popisu se odvojeno vode povjerioci sa pravom odvojenog namirenja i stečajni povjerioci razvrstani po pojedinim isplatnim redovima. Za svakog povjerioca potrebno je navesti poslovno ime i sjedište, odnosno ime, prezime i adresu prebivališta povjerioca za svaku pojedinačnu obavezu. Za različite povjerioce potrebno je dodatno označiti i predmet na kojem postoji različito pravo i vjerovatnu visinu iznosa za koji povjerilac neće biti odvojeno namiren. U popisu se navode mogućnosti za prebijanje novčanih potraživanja sa procjenom visine obaveza stečajne mase za slučaj uzastopnog i neprekinutog unovčenja imovine stečajnog dužnika.

U roku od 45 dana od dana imenovanja, stečajni upravnik je dužan da sačini uređen pregled u kome se nabrajaju i međusobno uređuju predmeti koji čine stečajnu masu i obaveze stečajnog dužnika sa stanjem na dan otvaranje stečajnog postupka. Pregled imovine sadrži procjenu sa kojim dijelom stečajne mase se može računati u stečajnom postupku za namirenje povjerilaca stečajnog dužnika.

Stečajni upravnik je dužan u službenim prostorijama suda izložiti popis predmeta stečajne mase, popis povjerilaca, tabelu prijavljenih potraživanja, pregled imovine i izvještaj o materijalno – finansijskom stanju stečajnog dužnika i uzrocima tog stanja, najkasnije osam dana prije izvještajnog ročišta.

Nakon otvaranja stečajnog postupka, stečajni upravnik ili lice koje on odredi je obavezan da vodi poslovne knjige, sačinjava finansijske izvještaje u skladu sa propisima o računovodstvu i reviziji, da vodi poreske evidencije, vrši obračun i plaćanje poreza u skladu sa propisima koji uređuju direktne i indirektne poreze.

Stečajni upravnik je ovlašten i obavezan da bez odgađanja uđe u posjed imovine koja spada u stečajnu masu, upravlja njom, po mogućnosti nastavi poslovanje do izvještajnog ročišta, ako to ne šteti stečajne povjerioce, unovči je u skladu sa odredbama Zakona o stečaju. Ako je neophodno za poslovanje i očuvanje stečajne mase, stečajni upravnik ovlašten je da i prije odluke odbora i skupštine povjerilaca, u toku poslovanja unovči pojedine predmete i kvarljivu robu. Na osnovu rješenja o otvaranju stečajnog postupka, stečajni upravnik ovlašten je zahtijevati predaju cjelokupne imovine i dokumentacije koje se nalaze u posjedu stečajnog dužnika, kao i imovinu stečajnog dužnika koja se nalazi u posjedu trećih lica.

Stečajni upravnik ima između ostalog sva prava i obaveze utvrđene Zakona o stečaju Federacije Bosne i Hercegovine, kao i na temelju pozitivnih propisa.

Rješenje o otvaranju stečajnog postupka sud objavljuje na oglasnoj tabli suda, web stranici suda – elektronskoj tabli suda, na Internet stranici FIA – e, a u „Službenim novinama Federacije BiH“ objavit će se samo izreka rješenja.

ZAKAZUJE SE ROČIŠTE ZA ISPITIVANJE PRIJAVA POTRAŽIVANJA ZA DAN I SAT:

UTORAK 03.12.2024. GODINE U 10,00 H SATI U SOBI: 229/II

Dostava se smatra izvršenom istekom pet dana od dana oglašavanja u „Službenim novinama Federacije BiH“.

Istog dana, nakon ispitnog ročišta, održat će se Skupština povjerenika, na kojoj će se, nakon izvještaja stečajnog upravnika, odlučiti o daljem toku stečajnog postupka.

O B R A Z L O Ž E N J E

Predlagatelj je podnio ovom sudu prijedlog da se otvori stečajni postupak nad imovinom stečajnog dužnika.

Postupajući po ovom prijedlogu, sud je Rješenjem u naznačenom predmetu od 13.11.2023. godine pokrenuo prethodni postupak radi utvrđivanja da li postoje uvjeti za otvaranje stečajnog postupka, te imenovao privremenog stečajnog upravnika Mustafić Edisa.

Sud je naprijed navedenim rješenjem je između ostalog izdao nalog privremenom stečajnom upravniku da utvrdi da li postoji razlog za otvaranje stečajnog postupka nad stečajnim dužnikom i da li imovina stečajnog dužnika može pokriti troškove stečajnog postupka.

Privremeni stečajni upravnik je postupio po nalogu suda i dostavio stečajnom sudu dana 22.05.2024. godine pisani Izvještaj. U Izvještaju privremeni stečajni upravnik je ostalog naveo da postoje uvjeti i razlozi za otvaranje stečajnog postupka, jer je stečajni dužnik platežno nesposoban, takođe je naveo da stečajni dužnik nema imovinu koja bi bila dovoljna za izmirenje troškova stečajnog postupka. Međutim, na ročištu održanom pred ovim sudom dana 03.07.2024. godine, stečajni upravnik je naveo da je naknadnim odlaskom u prostorije stečajnog dužnika pronašao imovinu vidu 3 SWITCHA- mrežna uređaja i kancelarijske stolice, čija se vrijednost ne može procijeniti bez angažovanja vještaka, te je predložio da sud donese odluku i otvori stečajni postupak radi utvrđivanja vrijednosti stečajne mase radi unovčavanja iste.

Zakonom o stečaju¹, i to odredbom člana 6. stav 2. propisani su razlozi za otvaranje stečajnog postupka, te je između ostalog navedeno i propisano da je to platežna nesposobnost stečajnog dužnika, a stavom 3. istog člana i propisa je navedeno da je

¹ „Službene novine Federacije Bosne i Hercegovine“, broj: 53/21

stečajni dužnik platežno nesposoban ukoliko nije u stanju da izvršava svoje dospjele i potraživane obaveze plaćanja. Odredbom člana 6. stav 5. Zakona o stečaju je propisano da je stečajni dužnik platežno nesposoban ako 60 dana neprekidno ne izmiruje svoje dospjele novčane obaveze ili je račun stečajnog dužnika blokiran 60 dana neprekidno.

Iz dostavljenog izvještaja privremenog stečajnog upravnika proizlazi da stečajni dužnik ne obavlja registrovanu djelatnost od 2017. godine, te da posluje u gubitku u iznosu od 145.580,00 KM i da ne izmiruje svoje dospjele obaveze.

Zakon o stečaju u svom članu 6. stav 1. propisuje da se stečajni postupak može otvoriti ako sud utvrdi postojanje stečajnog razloga, a jedan od razloga za otvaranje stečajnog postupka jeste između ostalog i platežna nesposobnost stečajnog dužnika.

Sud je na osnovu naprijed navedenog, i temeljem Izvještaja privremenog stečajnog upravnika, utvrdio da su ispunjeni uvjeti iz odredbe člana 6. Zakona o stečaju.

Na osnovu svega navedenog, a primjenom odredbe člana 6. Zakona o stečaju, stečajni sud je donio odluku, kako je to naznačeno u izreci ovog rješenja.

STEČAJNI SUDIJA

Mirsada Karahmetović

POUKA O PRAVNOM LIJEKU: Protiv rješenja o otvaranju stečajnog postupka, stečajni dužnik može izjaviti žalbu Kantonalnom sudu u Sarajevu u roku od 8 (osam) dana od dana dostavljanja rješenja. Žalba se podnosi putem ovog suda, u 3 (tri) istovjetna originalna primjerka.